

TE HEHEURAA API

I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

"E mata na râ outou i te imi i te basileia o te Atua, e te parau-tia na'na; e amui-atoa-hia mai taua mau mea ra ia outou." Mataio 6:33.

Nu. 4.

Eperera, 1913.

Mat. 6.

Teihea Ra te Parau Mau?

(TUATIRAA.)

¶ E parau nei oe e, 'Aita o te Atua e tino.' E tino anei to to tatou Fatu? Mai te mea e tino to'na, e tino atoa to te Atua, no te mea e, hoê â to raua huru. Hebera 1: 3. Ua fâ maira Iesu i rotopu i ta'na mau pîpî, i muri a'era i to'na tia-faahou-raa mai, ma te tino i'o e te ivi, e ua ani oia ia ratou ia fâfâ i to'na tino. Parau atoa maira oia e, 'Aita o te varua e i'o e te ivi mai to'u nei, ta outou e hi'o mai nei.' Luka 24: 39. Ei reira ani atura Iesu ia ratou ia horoa mai i te maa na'na ra, e ua amu oia i te reira. Luka 24: 42-3. Ia oti ta'na tamaraa, haere atura oia i nia i te basileia, e ua tia oia i te rima atoa no te Atua, mai ta Setephano i parau. Ohipa 7: 55. E teie nei, ahiri aita o'na e tino, teihea te tino ta'na i hopoi ê atu i te basileia?"

"E parau maamaa ta oe! Ua ite oe e, e varua te Atua, e te mana'o nei au e, e mea au ore ia tatou ia imi bohonu i te mau mea i rahuihia'i e te Atua," te na reira maira Viliamu.

Ua parau atura Tihare, "Faaoromai, no te mea te vai atura te parau mai te reira te huru, e ahiri te reira e parau

maamaa, e maamaa iā te Bibilia. Te parau nei oe e, e varua te Atua, nafea, e faaore anei te reira i te parau e, e tino to te Atua? Ua faauehia tatou ia haamori i te Atua na roto i te varua. E teie nei, na roto i taua faaueraa ra, ua faaorehia anei to tatou haamoriraa ia'na i roto i te pae tino nei? E varua anei to oe? E. E tino atoa anei to oe? E. Ua hamanihia anei oe i roto i te huru o te Atua, to oe tino e to oe varua? 'Hamani ihora hoi te Atua i te taata ma to'na ihora huru, i hamani oia ia'na ma te hoho'a o te Atua ra, i hamani oia ia raua, o te tane e te vahine.' Genese 1: 26-27. No reira e tino to te Atua, e te melo, e te hiaai atoa hoi. Ua paraparau noa mai Iehova ia Mose, mai te taata e parau noa i mua i te mata o to'na hoa. Exodo 33:11, e ua faaite oia ia'na i to'na tua. Exodo 33: 23. E mata to te Atua. Salamo 139: 16. E vaha to te Atua. Isaia 30: 27. E rouru to te Atua. Apokalupo 1: 14. Ua faaite te Bibilia ia tatou e, e Atua tahoo oia, e te ite nei tatou e, e Atua aroha oia. A hi'o i Ioane 3:16. E teie nei, e tino anei to te Atua? E melo anei to te Atua? E hiaai anei to te Atua? Oia mau, e tino to'na, e te melo e te hiaai atoa hoi."

Ua parau maira Viliamu: "Ia haamata vau i teie para-
paraauraa, mana'o ihora vau e, e taata tauturu paha oe, o
Tihare, ia'u. E mana'o huru ê roa râ to'u i teie nei. Ua
ite papu au e, ua haapii maite oe i te Bibilia."

"Ua na reira vau," parau atura Tihare, "no te mea ua
faauehia vau e to'u na metua ia taio maite i te parau a te
Atua, e te haamana'o nei au i te hoê irava i Ioane, i te pene
pae e te irava e toru ahuru e ma iva. Te na ô atura te
taioraa, 'Te imi nei outou i te parau i papaihia ra, no te
mea te mana'o na outou e roaa te ora mure ore i reira: o te
faaite iā ia'u o taua mau parau ra.'"

Ua na ô maira Viliamu, "E mea maitai te reira, area râ
te faaara nei au ia oe, eiaha e haere hohonu roa i te parau i
ite-ore-hia."

Parau atura Tihare, "Ua parau râ Petero e, 'te mau

tohu atoa i roto i te parau i papaihia ra, e ere ia te mea i imihia e te taata nei. E ere hoi to te hinaaro o te taata i tae mai ai te tohu i tahito ra, o te mau taata mo'a râ o te Atua, tei parau i ta te Varna Maitai i tuu mai ia ratou ra.' Petero II, 1: 20-21. E homa e, ia haapii maite tatou e tia'i i te parau a te Atua. No te ite ore o te mau orometua evanelia i teie nei mau mea, e vai nei te mau taata e rave rahi ma te mana'o tapitapi."

"Ua parau maira Viliamu e, "Mai te mea e parau mau ta oe, te mana'o nei au e, e mea maitai paha ia'u ia vaiiho Barone i roto i to oe rima."

"E hoa e," te na reira atura Tihare, "aita vau i hinaaro ia faaino ia oe; mai teie nei atu e haapao au i to'u mana'o."

"Parau maira Viliamu i reira, "E ohipa ê ta'u i teie nei pô, e no reira e haere au. Ia ora na outou."

Ia reva'tura oia, ua parau maira Barone e, "E Tihare e, ua mauruuru roa vau i ta oe mau parau, e te mana'o nei au e, ahiri i haapii au i te evanelia mai te au i ta oe a'oraa, ua tae paha ia vau i rotopu i te feia ekalesia. Ua mâtau au i te mau hiroa o te mau haapaoraa e rave rahi, e no reira te hinaaro nei au ia ite i te huru o to oe faaroo e to oe haapaoraa. E rave rahi anei to oe mau mana'o tei huru ê i te mau haapiiraa na te mau orometua Porosetani?"

"Ua parau atura Tihare e, "E. E mana'o huru ê to'u i to te mau orometua evanelia i roto i te mau haapaoraa Kerisetiano. E teie nei, mai te mea e hinaaro oe, tatou paatoa, e haere-imi-haere i te basileia o te Atua, e mauruuru roa vau." Ua faatia ratou atoa.

"Aita o'u e hinaaro mai teie te huru i te matamua," te na reira maira Barone.

"E teie nei," parau atura Tihare, "e rave tatou i te Bibilia ei buka ture, e te irava e toru ahuru e ma toru no te pene 6 no Mataio, ei irava tumu. Tera te irava tumu: "E mata na râ outou i te imi i te basileia o te Atua, e te parautia na'na ra,' e mai te mea e roaa ia tatou te ite e, e mea ê

te mau haapiiraa na te taata nei i te mau haapiiraa na te Mesia, e faatia-paha-hia vau i te parau ra e, 'ua hapa ratou (te mau orometua evanelia) i te ture ra, ua ruri-ê-hia e ratou tei haapaohia ra, ua pi'o ratou i te faufaa haapao-tamau-hia ra. Isaia 24: 5.

Ua rave Barone i te hoê Bibilia, e ua parau maira oia ia Tihare, "A faaite mai oe ia'u i te pene e te irava, ia ite ai au e, ua tano anei ta oe taioraa."

Ei reira parau maira te taote o Ioane, "E mea puai to'u hinaaro e ite i te auraa o te parau a te Atua. E rave au i ta'u Bibilia e taio i te mau faahororaa."

"Aita e peapea," parau atura Tihare, "e hi'opoa tatou i te evanelia a Iesu Mesia, i tera faaueraa e tera faaueraa. Mai te mea e hinaaro tatou i te mana'o papu i tera mau mea, ia haamata tatou e tia'i i te tau no Adamu. Na roto i te hi'araa o Adamu ma, e roohia te taata taatoa i te pohe, e aita a te taata e ravea ia faaore i te reira utua, e e roaa ia ratou iho te ora mure ore. A hi'o i Genese, te pene 1, 2, 3; Roma, te pene 5: 12; e Korinetia I, te pene 15: 21-22. Area râ, ia ore te taata e mou, ua tonono mai te Atua i ta'na tamaiti ia Iesu Mesia ia faatia i teie ture harahia, e ia faaora i te taata no te mana o te pohe. Ioane 3: 16; Roma 5: 8; Ioane 4: 9, 'Mai te pohe hoi i noaa i te taata ra, no te taata atoa e noaa'i te tia-faahou i te feia i pohe ra,' Korinetia I, 15: 20-23; Roma 5: 12-19, e e tia ratou i mua i te parahiraa haavâ a te Atua ia faautuahia i ta ratou iho mau hara, eiaha râ no te hara a Adamu. Ohipa 17: 31; Apokalupo 20: 12-15; Mataio 16: 27. E parau mau anei ta'u."

"E, ua tano ta oe mau faahororaa," parau maira te taote.

"Na roto i teie mau irava, ua faaite au ia outou e, e hape to te tahi pae o te mau haapaoraa Kerisetiano, no te mea te faaroo nei ratou e, e ore roa te taata hara e faatia-faahou-hia, mai te taata parau-tia. Aita Iesu i pohe i ta tatou mau hara, maori râ e haapao tatou i te ravea tei faa-itehia e a'na ra. 'Teie te mea e ite ai tatou e, ua ite tatou

ia'na, ia haapao tatou i ta'na parau. O tei parau e, ua ite au ia'na, e aore oia i haapao i ta'na parau, e haavare oia, aore te parau mau i roto ia'na.' Ioane I, 2: 2-4. Ua faaite a'enei au ia outou e, e hapa to te mau orometua evanelia i ta ratou haapiiraa no te huru o te Atua, e e faaite atoa vau ia outou e, aore ratou i haapao i ta'na parau. Ua parau atu Iesu e piti parau e au ia tatou ia haamana'o. Teie te hoê, ia pee tatou ia'na e tia'i, e teie te piti, e tono oia i te itoito i ta'na mau pîpî, e e aratai te reira i te mau parau mau atoa. No reira ia pee tatou ia'na e tia'i, e e haapao i te mau parau atoa ta te mau Aposetolo i parau mai, ia uruhia ratou e te itoito, oia hoi te Varua Maitai, mai te mea e patoihia te reira e te mau parau a te mau orometua evanelia i teie nei anotau noa'tu."

"Ua tia ta oe a'oraa, e e au te reira i te parau i papaihia ra, e aita'tu e i'oa (maori râ to Iesu) i faaitehia mai i te taata i raro a'e i teie nei ra'i e ora'i tatou nei. Ohipa 4: 12. E no reira a horoa mai ia matou i te mau ture e te mau faa-ueraa, ia haapao tatou e tia'i, area râ a faaite mai oe ia matou i to ratou vairaa e ite ai matou e, e parau mau ta oe e aore anei."

"E teie nei," parau atura Tihare, "e feruri tatou i te mau mea ta te Atua i hinaaro ia tatou nei, a haamana'o râ tatou e, e ore te Atua e tono mai i te mau taata i roto i teie nei ao ia haapii ratou i te parau êê; ahiri e na reira oia, e tupu te mârô i reira i rotopu i te mau tamarîi a te taata nei. 'E ere hoi te Atua i te tumu no te anoi noa, no te hau râ,' Korinetia I, 14: 13, e ua parau Paulo e, 'Ia a'o atu râ matou, eiaha'tu ia, o te tahi melahi no te ra'i mai, ia a'o atu ia outou i te Evanelia, maori râ i tei a'ohia'tu e matou ia outou na, ia riro oia ei anatema. Galatia 1: 8-9. Teie te mea matamua ta te Atua i hinaaro ia fatou nei: ia faaroo tatou e, te vai nei te Atua; e ere râ te Atua mai tei faaitehia i roto i te Buka Pure e te mau hiroa no te Porosetani, e i roto i te mau hiroa hoi no te ekalesia Katolika, ta'u i taio a'enei i mua ia outou.'"

(E tuatihia mai teie parau.)

Te Parau Tuatapapa no
Iosepha Semita.

(TUATIRAA.)

PENE XXXI.

MATAHITI 1839.

*Ua imi noa te na tîtî, i tapeahia i roto i te fare auri, i Libe-
reta, i to ratou tiamâ. Afaihia ihora ratou i Galatina e
haavâhia. Ua faauehia ia afaihia ratou i te mataeinaa
ra, i Boone. To ratou haere-ê-raa'tu i te mau tiaï.
Haapaohia a'era te amuiraa i Fa Wese. Ua tupu te
hoê tohuraa. Faarue ê atura te mau Feia Mo'a hopea i
Missouri.*

Ua tapea-noa-hia te Peropheta e ta'na ra mau hoa i roto i
te fare auri, e aita i faatiatia ia haavâhia ratou i roto
i te hoê haavâraa tia, e no reira hinaaro ihora ratou ia haere
tiamâ ê atu, mai te mea e faatia mai te Fatu. Ua ui atura
Iosepha i to te Atua hinaaro, e pahono maira Oia e, mai te
mea e faatia ratou i te haere i taua pô ihora, e faaineinehia
te tahi ravea na ratou. Ua mātā'u rii ihora râ o Limana
Uaita, e parau atura oia i te mau taeae ia tiaï rii, e i te pô
i muri iho e tamata ratou i te haere. Ua na reira ratou, e
faautuahia ihora ratou e te Atua no to ratou tiaïraa. I taua
pô ihora, haere maira te tiaï ana'e no te fare auri, e vaiiho-
iriti-hia a'era te opani i muri iho ia'na, e e mea ohie roa ia
horo atu ratou i rapae. I te pô i muri iho râ, ia haere mai
te tiaï no te fare auri, haere atoa maira te tahi atu â mau
tiaï, e te tahi na taata manihini, e ia tamata te mau taeae i
te horo i rapae, mauhia ihora ratou e te mau tiaï, e tapea-
faahou-hia a'era ratou e to ratou na taata manihini atoa hoi.
Ia faaue mai te Atua ia tatou, hinaaro ihora Oia ia haapao
tatou i taua taime ihora. Ia faaroo to te oire e, ua tamata te
mau tîtî i te horo tiamâ ê atu, haaputuputu maira ratou, e riri
roa a'era; parau ihora râ Iosepha e, eita ratou e hamani-ino-

hia, e eita e moe te hoê mea i to ratou na taata manihini, e oia mau atura.

I te mahana 6 no Eperera, 1839, afaihia ihora te na tîtî no Libereta mai, i Galatina, i te mataeinaa ra, i Daviesa, ia haavâ-faahou-hia ratou e te haavâ ra, e Kiga. Aita roa te na taeae i tia i te haavâraa tia, no te mea e fetii ia o Kiga no te hoê taata tei pupuhihia i roto i te aroraa, i ropu i te Feia Mo'a e te enemi, i te mataeinaa ra, i Iaketoni, i te mahana 4 no Novema, e e enemi mau oia no te mau taeae. E i taua taime ihora, tapu atura na taata e pae ahuru no Daviesa e, e ore roa ratou e amu, e aore râ e inu, ia taparahi atu ratou ia Iosepha Semita. Măta'u iti a'era te tahi na taeae i te haere, area i parau atura Iosepha e, mai te mea e tia-turi ratou i te Atua, e paruru mai oia ia ratou ra.

Ia tae atura ratou i te fare haavâraa, horo oioi maira te enemi ia ratou, tia'tura râ o Iosepha mai măta'u ore, e parau atura oia ia ratou e, "Tei roto ia tatou i to outou mau rima. Mai te mea ua hapa tatou, e faatia tatou i te faautuahia i te ture." Ia faaroo te enemi i te reira, faaea ihora ratou, e ua tupu mau ta Iosepha i parau atu i te mau taeae, no te mea aita ratou i hamani-ino-hia, e tauturu rii maira te tahi ia ratou. Ua taero iho â o Kiga, haavâ, e te tahi atu â mau taata i roto i te haavâraa, e ia faaite atura o Setephano Marakama i te parau mau no te mau taeae, ia faarue ê atu oia e tia'i i Galatina i taua pô ihora, ia ore oia e taparahia.

Ua faaue atura o Kiga ia afaihia te na tîtî i te mataeinaa ra, i Boone, e a haere atu ai ratou, taero roa ihora te na tia i. Ua mana'o ihora Iosepha ma e, ua tae i te taime i faaineine mai ai te Atua i te tahi ravea ia haere tiamâ ê atu ratou. Ua ite ratou e, aita roa te mau haavâ i rave i te mea tia, e tapea-noa-hia ihora ratou i roto i te mau fare auri, mai te ore i au i te ture, e no reira mana'o ihora ratou e, e mea maitai ia faaora ratou ia ratou iho. O te mahana 16 ia teie no Eperera, e faarue ihora ratou i te na tia i, e haere maite

atura i te anavai ra, i Misisipi. Ua tere ratou i te pae rahi o te taime i roto i te mau pô, haere atura ratou i tera pae mai no te mau anavai, e te mau ooa teitei, e ati ihora ratou i te poia, e te mau vero, area râ na roto i te aroha o te Atua, tae a'era ratou i te oire ra, i Tuinici, e iteahia ihora te pae rahi o te Feia Mo'a i reira.

I mua iti a'e i te haamataraa o te peapea hopea no te Feia Mo'a i Missouri, i te mahana 8 no Tiurai, 1838, ui atura Iosepha i te Atua i to'na hinaaro i te pŭpŭ ahuru ma piti Aposetolo. Ua parau maira te Atua e, e tairuru ratou i te vahi tiaraa no te hiero i Fa Wese, i te 26 no Eperera i muri iho, ei reira faarue i te Feia Mo'a. Ia faaroo te mau taata taiva e te enemi i te reira tohuraa, tapu atura ratou e, e ore roa ia e tupu. Tei roto ia Fa Wese i to ratou mau rima, e ua iti roa te Feia Mo'a, e parau haamăta'u atura te enemi i te taparahi i to te pŭpŭ ahuru ma piti Aposetolo, mai te mea e haere ratou i reira.

Ua haaputupu ihora o Birikama Youne i te mau Aposetolo, e parau atura oia ia ratou e, ia faatupu ratou i te parau a te Fatu e tia'i. Ua haere atura ratou ma te măta'u ore i Fa Wese, e i te mahana 26 no Eperera, 1839, i te poi-poi roa, i mua'e i te araraa mai o to ratou mau enemi, tairuru atura ratou i te vahi tiaraa no te hiero, e haapao ihora i te amuiraa. Faatoroa'tura ratou ia Vilifora Vudurufara o Tihoti A. Semita ei na Aposetolo, e huri ihora i na taata e toru ahuru ma hoê i rapae i te Ekalesia, e faaoti a'era i te pureraa. Ia parau ratou, Ia ora na, i te Feia Mo'a, haere atura ratou i Tuinici. Ua faatupu ratou i te hoê tohuraa ta te mau taata taiva i parau atu ai e, e ore roa ia e tupu e na te reira e faaite atu e, e Peropheta haavare ia Iosepha.

I teie nei taime, faarue ihora te mau Feia Mo'a i toe i taua fenua ra, e haere atura ratou i Ilinoi. Ua tae maira ratou i te reira tufaa fenua apî, i Missouri, i te matamua ma te oaoa e te faaroo puai, e teie nei faarue ihora ratou i te reira fenua ma te oto e te peapea rahi, aita râ i paruparu to

ratou faaroo. Ua faataa-ê-hia ratou i to ratou mau fare e te fenua, e te mau tao'a faufaa rahi. Faarue ihora ratou i te mau vahi hunaraa no to ratou mau fetii here, o tei pii noa atura to ratou mau varua i te tahoo na te Atua.

—OLE PETESONA.

(E tuatihia mai teie parau.)



TE HOE MOU'A HURU Ê I UTAHA, I AMERIKA.

Te Mau Parau Api.

I ROTO i te avae Tenuare, ua pohe e hoê ahuru taata faatere pahi reva.
Ua pohe roa e 227 taata i taua ohipa ra, mai te haamataraa mai.

No te mau pô toetoe roa i te mau mahana matamua no Febuare, ua pau e na milioni dara i te faufaa i te feia faaapû anani e te taporo i Tarafonia. No te toetoe rahi i te pô, pohe te mau tiare, e te maa apî i nia i te mau tumu anani e te taporo. Ua ora te tahi mau faaapû i te tahi ravea paari; ua rave te tahi mau taata i te mau umu mori e au no tera ohipa, e ua tuuhia i raro i te mau tumu, e no te mahanahana o taua mau umu ra, ua ora te tahi mau faaapû.

I te fenua Ausarelia, ua tupu te hoê peapea rahi roa i te hoê tane e ta'na vahine. Ua haere raua i roto i to raua fare tutu, e ua taviri i te opani, tama'i atura raua. Ua rave raua i na to'i e te tipi e ua taputô raua. Ua motu ino roa te upoo o te tane, e ua tâpû-ê-hia te rima o te vahine, ei reira ua pararî roa te upoo o te vahine, pohe roa ihora. Ua nee haere te tane i pihaiho i te haamaramarama, e faaite atura i te hoê taata i to raua peapea; pohe atura oia.

E mea maoro i teie nei, ua ma'ihia te mau tumu haari i te mau fenua moana nei, e ua popohe e rave rahi i te manu. I teie nei, ua tae mai ia tatou te parau apî, ua roohia te mau tumu paina i Tarafonia, e i Oregona, no reira mai to tatou raau, i te hoê ma'i, e o te tahi huru manu te tumu o taua peapea ra. I roto i teie nei matahiti ua pohe roa e vau milioni tumu raau. Ua tonu atu te hau Amerika i te feia maramarama i taua ohipa ra, ia imi ratou i te ravea e tupohe i taua manu ino.

Ua ite te mau nănă eiâ, tei roto i te hoê fare i Niu Ioka, i te hoê mau tao'a moni rahi ra, e ua imi ratou i te ravea paari e roaa mai ai ia ratou taua mau tao'a ra, e ua tarahu ihora ratou te hoê fare tapiri a'e i taua fare vairaa faufaa ra. Ua parahi ratou i roto i taua fare i tarahuhia e ratou ra e ua imi ratou i te ravea e roaa mai ai taua faufaa ra, e ua heru ratou te hoê apoo i raro a'e i to ratou fare e tae noa'tu i taua apoo ra i raro a'e i te tahua o taua fare ta ratou i ite i te faufaa rahi ra, e ia tae i te hoê pô, ua êê ratou na raro a'e i te tahua i te hoê puta, e tomo atura ratou i te piha e vai ai te mau faufaa rahi. Ua rave ihora ratou i te mau uati, e te mau huru tapea rima, e te daimoni e roaa e 25,000 dala. Ua roaa atoa ia ratou e 60,000 dala moni parau, e e 8,000 dala moni paari. Te imi noa nei te mau mutoi i taua mau taata haru ra e aita hoi i itea i teie nei â. Te apoo ta taua mau nănă eiâ ra i heru, ua haere ia na roto i te mau patu, e te timâ, e e riro e piti avae ratou i te heru i taua apoo ra. Ua ravehia teie ohipa i te 17 no Mati.

Ua ani atu te hau Amerika i te mau basileia ia tonono mai nei ratou i te tahi taata toroa i te tomoraa i te tâpûraa i Panama, i te matahiti 1915. E oti taua ohipa rahi ra i teie nei matahiti; te tomoraa mau râ, e vaiiho-hia e tae roa i te matahiti 1915.

E toetoe iti rahi roa i Amerika i te avae Febuare, e ua topa mai nei te hiona e rave rahi roa, i ihora te mau purumu. No te rahiraa o te hiona aore i nehenehe ia haere te mau tamarii i te haapiiraa. E rave rahi te mau e'a pereoo auahi o tei i roa i te hiona, e no te teitei roa o te hiona aore i nehenehe ia haere te mau pereoo auahi. Ua tausani te puaatoro e te mamoe i pohe i te toetoe rahi.

E hoê hanere matahiti a'enei ua pohe te hoê aito tuiroo rahi no te faehau Amerika; i to'na poheraa aita ona i hunahia, ua tuuhia râ to'na tino i roto i te alcohol, oia hoi i te ava, e ua vai noa to'na tino i roto i te reira ava e tae roa i teie nei. I te avae Febuare, ua iritihia to'na tino no roto mai i te ava, e ua tuuhia i roto i te hoê afata nehenehe roa e ua haapaohia te hoê oroa rahi no to'na hunaraa ra.

Ua oti a'enei te hoê matini oiraa faraoa i te hamanihia, e e oti maitai e 500 faraoa i te minuti hoê i taua matini ra, e e oti e 3,000 faraoa i te hora hoê, e e 30,000 faraoa i te mahana hoê. Na te matini iho i faataa i te repo no roto mai i te faraoa hu'a, e e faararî i te pape, e oi. e e tuu i te faahopue, e e tâpûpû, e e faafaito, e e faanehenehe ei faraoa. Ia oti i te reira, na te matini iho e hopoi atu i roto i te mau umu rarahi. Mai te tuuraa i te faraoa hu'a i roto i te matini e tae roa'tu, ua iritihia ei faraoa eumaitai-hia no roto mai i te mau umu, aita roa te rima taata i rave noa'tu.

Ua tae mai te parau apî, ua tupu te hoê ati rahi e te ri'ari'a, i Amerika, i te 24 no Mati. I te hora 6 i te ahiahi, ua tupu te hoê puahiohio i te oire ra, i Omaha, i te mataeinaa, i Nebraska. O te hoê teie o te oire rarahi no Amerika. Ua haere taua mata'i puahiohio na ropu mau i te oire, e hoê maile te aano no te purumu, e e vau maile te roa. I roto i na hora e piti ua pohe roa e piti hanere taata, e ua tausani te mau fare i pararî roa. Ua tahuri te mata'i i te mau fare e rave rahi, ei reira ua paapaa taua mau fare ra i te mau umu auahi o roto i tei tahuri-atoa-hia. I roto i te hoê fare teata faaiteraa hoho'a ua pohe e maha ahuru o te taata, e i roto i te hoê fare pere, ua pohe e fatata e pae ahuru taata ereere. Ua faauehia te faehau e haere e tauturu i te ohipa faaoraraa i te taata, e e tia i te ohipa ia ore te reira e eiâhia e te feia haru. Ua hanere te mau taata i haaparuparuhia, e tei roto ana'e ratou i te mau fare ma'i. I te oire ra, i Terre Haute, ua pohe roa e piti ahuru taata, e ua haaparuparuhia e hitu ahuru e ma pae taata, e ua pararî ino roa e piti hanere fare. Ua parauhia, na te mata'i i afai tino roa i te tahi mau fare e aita â hoi i iteahia taua mau fare i teie nei.

I roto i te avae Tiunu, e tae mai ai te pahi auahi apî afai vea, e i roto i taua avae ra e haamata'i taua ohipa maitai ra. Te i'oa o taua pahi apî ra o "Saint Michel", e e afai haere i te vea, e te tao'a, e te mau horo patete na te mau fenua Raiatea ma, e Tubuai ma, e na te Tuamotu atoa.

I roto i Mati, ua tupu i Makatea te hoê ati rahi roa, oia hoi, ua pohe te hoê taata, o Albert Goupil, te tamaiti na Tupi. Mai tera te huru o to'na poheraa ta matou i faaroo ra, tei nia oia i te mou'a, e a haere ai oia i raro na nia i te mau pereoo faauta repo mai tei mâtauhia i te mau mahana atoa, inaha, ua matara te fifi tapea i te pereoo, ta'na i haere ra, e ua oioi roa te haereraa i raro o taua pereoo, tae atura i raro, û atura taua taata ra i te hoê auri; pohe roa ihora.

Te huru, e tau ati rahi roa teie. I te 27 no Mati, i na mahana i muri iho i te puahiohio, ua tupu faahou te hoê ati rahi roa i Amerika. Ua roohia te hoê mau oire i te vaipue rahi, e ua pohe roa e hoê tausani e pae hanere taata (1500), e mea rahi roa i haaparuparuhia. Ua tausani, e ua tausani te mau puaahorofenua i pohe roa, e te vai noa ra to ratou mau tino pohe e ua hau'a ino rahi roa. Tei roto ia teie nei parau i te vea hopea ta matou i farerei, e aita hoi i itea te hopea o teie nei ati rahi.

E peapea huru rahi Amerika raua Beritane e tera hoi te tumu, oia hoi, te ohipa i Panama. Hou te ohipa i Panama i ravehia, ua fafau raua i te hoê faaauraa, e te na ô maira te hoê irava o taua faaauraa parau e, e hoê â te taime, oia hoi te moni, e titauhia no te mau pahi o te mau basileia e haere na taua tâpûraa i Panama, oia hoi, ia oti i taua e'a pahi ra, eita te hau Amerika e hi'o pae tahi i te mau pahi no te tahi mau basileia, mai te ani i te moni maamaa i to te tahi mau basileia pahi. I te tahi mau avae a'enei ua hamani te Apooraa rahi no te Hau Amerika te hoê ture apî, o tei na ô mai e, e haere noa ma te taime ore te pahi no Amerika iho na roto i taua tâpûraa ra i Panama. Ua au taua ture apî ra i te mau pahi ana'e o te tere mai, mai te mau oire i te Hau Amerika i te miti Atalanata e tae roa mai i te oire i tahatai i te Hau Amerika i te miti Patitifa; eiaha e au taua ture no te mau pahi Amerika, o tei tapae haere i te mau basileia êê, e anihia hoi te taime na taua mau pahi ra. Te na ô mai nei Beritane e, eita e nehenehe ia faaherehere Amerika i to'na ihora mau pahi, e te na ô mai nei Amerika e, e mea nehenehe noa ia haapao maitai i to'na ihora mau pahi. Arau a'e tatou e ite i te hopea no teie mârôraa.

Toae a Maire, Faaau Parau,

Rue Dumont d'Urville, Orovini, Papeete, Tahiti.

Frank J. Fullmer, Imprimeur,

Rue Bréa et de la rue Dumont d'Urville, Papeete, Tahiti.